

Parlament pozvao Ahmadinejada na saslušanje

8 februar 2012 Izmijenjeno 07:35 CET

Iranski predsjednik suočit će se sa dugom listom pitanja o ekonomiji, odlukama u oblasti vanjske i unutrašnje politike



Ovo je prvi put od islamske revolucije 1979. godine da parlament pozove predsjednika na saslušanje [AFP/Getty Images]

Iranski parlament pozvao je predsjednika Mahmouda Ahmadinejada da odgovara na pitanja zastupnika prvi put od islamske revolucije 1979. godine, prenijele su agencije. Predsjednik Irana suočit će se sa dugom listom pitanja o stanju ekonomije, kao i o odlukama u oblasti vanjske i unutrašnje politike. Za saslušanje Ahmadinejada u utorak je glasalo 79 od 290 članova iranskog parlamenta, a zvaničan poziv će mu biti upućen u naredna dva dana. „Ahmadinejad će odmah biti obaviješten o odluci. On se mora pojaviti u parlamentu 30 dana nakon što je zvanično obaviješten“, rekao je zakonodavac Mohammad Reza Bahonar. Ovaj rok znači da iranski predsjednik može izaći pred poslanike poslije parlamentarnih izbora drugog marta, što će biti prvo glasanje na državnom nivou od spornih predsjedničkih izbora 2009. godine.

Poziv na odgovornost

Prema ustavu, predsjednik se može pozvati na odgovornost ukoliko ignorira pozive parlamenta, ili ako ne uspije dati odgovore na pitanja zastupnika. Međutim, pozivanje na odgovornost je malo vjerovatno, zato što bi oštetilo cijelu vladajuću strukturu u vrijeme kada je Iran pod velikim pritiskom Zapada zbog nuklearnog programa, prenose agencije. Poslanici su prijetili sličnom akcijom i ranije, ali su njihovi pokušaji propali, ponekad zbog toga što ih je blokirao vrhovni vođa ajatolah Ali Khamenei.

Sukobi vlasti

Parlament u Iranu se često sukobljava s vladom zbog ekonomske politike predsjednika. Ahmadinejad i njegove pristalice pokušavaju umanjiti utjecaj vladajućih islamskih imama. Pojedini analitičari povezali su poziv parlamenta upućen predsjedniku sa pokušajima određenih zastupnika da dobiju podršku glasača koji ne podržavaju vladinu politiku. Khamenei je ranije predložio da umjesto građana, predsjednika bira parlament, međutim, kritičari su rekli da bi to moglo oslabiti iransku verziju demokratije.

Izvor: Al Jazeera